

Rapport presidial dil cussegl pastoral Trun per mauns dalla radunonza dalla pleiv catolica romana Trun, dils 3 da zercladur 2026

Preziau signur president
Preziada suprastonza
Preziau sur dr. Tomasz Piotr Drwal
Preziadas parochianas e preziai parochians

Bugen prend'jeu la caschun d'orientar la hodierna radunonza sur dil curriu e passau el cussegl pastoral.

Commembras/commembers:

Mathias Bundi	president	abdicau
Sur Tomasz Piotr Drwal	plevon	
Olivia Pfister	actuara	abdicau
Claudia Bundi	cassiera	abdicau
Andriu Demont		
Angelo Cavegn		abdicau
Beat Hosang per miert		abdicau
Clau Scherrer		abdicau
Claudia Küttel		
Corina Petschen		
Crista Pelican		
Giusep Bundi		abdicau
Isabelle Defuns		abdicau
Marcus Schmed		abdicau
Mäggi Della Valle		
Rilana Cadruvi		abdicau
Toni Pfister		

Intent e finamira dil cussegl pastoral

Tenor artechel 3 dil regulativ vertent ein igl intent e las finamiras dil cussegl pastoral fixadas sco sonda:

Art. 3 Intent e finamiras

Il cussegl pastoral ei in organ ecclesiastic, el qual parochianas e parochians s'engaschan per ina stretga collaboraziun denter la pleiv e la vischnaunca da Trun.

Il cussegl pastoral collaborescha cul plevon e cussegla quel en tuts fatgs da pastoraziun ed organisaziun parochiala. Ils commembers dallas gruppas s'occupeschan – mintgin e mintgina tenor ses duns – cun in ni plirs dils dus pensums fundamentals dalla Baselia e lavur pastoral.

Quels pensums ein:

- *Liturgia e diaconia*
- *Annunziaziun e cuminonza.*

Tgei ha fatschentaun nus?

Nus havein danovamein sedau giu cun las damondas sur digl intent, sur dils pensums e las finamiras dil cussegl pastoral.

Denter auter han las damondas

- tgei ein ils basegns da nossas parochianas e nos parochians
- tgei capesch'ins ozildi sut pastoraziun ed accumpignament
- tgei vegn pretendiu dalla pastoraziun
- tgei accumpignament vegn giavischau
- tgei sa la baselgia porscher alla cuminonza
- drova ei la baselgia per scaffir e viver cuminonza
- tgei purschidas ein bunas ed apprezzadas e tgeininas astgan vegnir adattadas
- eav.

danovamein fatschentaun nies gremi. Damondas ch'ei buca semplas da rispunder. Damondas che mintgin da nus sa tschentar a sesez ed era rispunder per sesez.

Ina dallas damondas ei denton era «tgei sai jeu sco singul porscher alla baselgia ed alla cuminonza».

Il cussegl pastoral duess

- buca mo esser in gremi dapli ella organisaziun dalla pleiv
- vegnir sentius e vesius sco ligiom denter parochianas e parochians ed ils responsabels
- dalla pleiv e dalla pastoraziun
- segidar ella formaziun da nossa cuminonza, segirar, francar e promover tala
- s'engaschar tier l'evaluaziun dils basegns e giavischs da nossa cuminonza dad oz e vegnenta.

La finamira ei stada da segidar e collaborar cun tuts funcziunaris, gremis ed acturs per ina buna e sauna cuminonza.

Abdicaziuns

Las numerusas abdicaziuns da commembras e commembers dil cussegl pastoral ein igl attestat che buca tut funcziunescha bein en nossa cuminonza. Las stentas dil cussegl da mirar anavon, encurir novas purschidas, tschentar damondas criticas, encurir ensemen las rispostas sin las sura numnadas damondas han fatg naufragi.

Podà

- ch'il temps ei aunc buca madirs per midadas
- che la situaziun che regia vegn valetada sco buca urgenta
- che l'acceptanza digl engaschi ed il sustegn da «laics» drova dapli temps en nossa pleiv.

Ord mia vesta astga il cussegl pastoral buca vegnir degradaus sin in gremi ch'organisescha mo ils aperitivs e las processions dallas fiastas da baselgia. Jeu sundel fermamein perschuadius ch'il cussegl pastoral ha l'incumbensa da sedar giu denter auter cun las sura numnadas damondas e duers.

Engaschi

Tradiziuns ston ins viver, ei drova leutier in bien cor ed in saun spért e surtut perschuasiun ed engaschi.

Tier las usitadas fiastas da baselgia ed ulteriuras s. messas ni occurrenz, sco per exempel

- Sontgilcrest
- Perdanonza a Zignau
- Perdanonza a Schlans
- Perdanonza a Trun
- Di dallas mummas
- Vendita da candeilas durant ils dis da Pastgas
- Survetschs divin dil plaid
- Messas da scola
- Cantar dils s. retgs
- Visetas a senioras e seniors en las casas da tgira ed attempai
- eav.

ein commemoras e commembers dil cussegl pastoral s'engaschai sco usitau, seigi quei organisatori, activ sco era cun organiser e porscher differents aperitivs.

Ils 17 d'uoost 2025 ei la messa campestra a Schlans vegnida celebrada. In bellezza e cauld di da stad ha carmalau ina biala roschada a Schlans. Sil plaz avon la caplutta Nossadunna dalla Neiv ha sur Tomasz celebrau il survetsch divin ch'ei vegnius enramaus musicalmein da sgugialaders e suna tibas. Silsunter ei la raspada vegnida envidada ad in gentar comunabel ed il di ei vegnius rundaus giu entras ina guida atras Schlans. Nus savein mirar anavos sin in fetg bi di ed jeu engraziels als organisaturs per quella purschida.

Ils 14 da settember havein nus festiva la perdanonza a Nossadunna dalla Glisch, il Num da Maria. Tradizionalmein ei il liug da fiasta vegnius endrizzaus sut l'egliada dil caluster Vendelin Decurtins. Tut ei stau preparau ed ornau en tempra festiva ed il predicatur da fiasta, sur Peter Camenzind, ensemen cun sur Tomasz, han celebrau la s. messa accumpignada dil chor da baselgia. La societad da musica da Trun ha tgamunau la procession ed era delectau sil plaz da fiasta cun entgins tocs musicals. Per l'emprema gada ei vegniu purschiu ad in e scadin in gentar sil plaz da fiasta. Ils resuns per quella purschida supplementara ein stai fetg positivs ed animeschan aschia da cuntinuar ed ira vinavon sin quella via.

L'uniun da giuventetgna Trun ed il cussegl pastoral han envidau ils 19 da settember al survetsch divin per giuvenils "Las portas sesarvan per vus" cun nies Uestg Joseph Maria Bonnemain. Igl ei stau ina invitaziun da s'entupar, da viver cuminonza, da far damondas e forsa era da prender peda. Giuvnas e giuvens han accumpignau il survetsch divin cun cant e musica. Nies Uestg Joseph Maria ha giu grond plascher da celebrar la messa cun ils giuvenils dalla regiun e siu fascinont priedi ei vegnius tedlaus cun grond interess. Suenter il survetsch divin ein tuts stai envidai da seser ensemen tier ina ligiongia barsada ed in sitg en Sala da cultura. Era leu ei igl Uestg staus presents e dau ina paterlada cun in ni l'auter.

La vigelgia da Nadal ha il survetsch divin per famiglias inagada dapli empleniu la baselgia parochiala. In bellezza survetsch divin cun fetg bi cant dil chor d'affons ad hoc ha spluntau vid sentiments ed emeziuns. Cun cor aviert, cuntents ed en paisch han ins aschia saviu ira enviers la legrevla fiasta da Nadal.

Engraziament

Dabia ei gartegiau fetg bein ed auter detg bein, e quei grazia a da biars mauns che van in en l'auter. Fetg bia engaschi ei vegniu prestau e bia temps liber ei vegnius unfrius per il beinstar e la cuminonza.

Bugen engraz'jeu zun fetg a tuts sponsurs dils differents aperitivs.

Jeu engraziel allas con commemoras ed als con commembers dil cussegl pastoral per lur grond engaschi e sustegn.

In cordial engraziament alla organista ed als organists, al chor da baselgia ed alla societad da musica per lur producziuns canticas e musicalas che dattan adina ina tempra festiva als survetschs divins ed allas occurrenzas.

Allas catechetas Isabelle e Rilana in grond engraziament per lur grondiusa lavur per nos affons, per las scholaras ed ils scholars. Deplorablamein han ellas abdicau lur plazzas ed jeu sperel che lur successur ni successurs mondien vinavon sin quella via e che nus tuts e nos affons sappien era selegrar e festivar vinavon quellas bellezza fiastas d'emprema s. Comuniun e survetschs divins da famiglia en ina tala tempra festiva e familiara.

Dieus paghi a sur Tomasz ed als representants dalla pleiv per la collaboraziun e l'udida per ils fatgs e giavischs dil cussegl pastoral.

Plaid final

Jeu sperel ch'ei gartegi a tuts funcziunaris, gremis ed acturs da collaborar per ina buna e sauna cuminonza.

Per il cussegl pastoral

Mathias Bundi, president